

სახელმწიფო აუდიტის სამსახური



„ვ ა მ ტ კ ი ც ე ბ“

აუდიტის დეპარტამენტის უფროსის მ/შ
აჭარის ავტონომიურ რესპუბლიკაში

კახაბერ კირტავა

28 . 12. 2015 წელი

2 ეგზ.

ა(ა)იპ „ბათუმის გამწვანებისა და ლანდშაფტური
დაგეგმარების სამსახური“

შესაბამისობის აუდიტის ანგარიში N35/105

2014 წლის 1 იანვარი - 2014 წლის 31 დეკემბერი

სარჩევი

აუდიტის ანგარიში

შემოკლებანი:.....	3
შემაჯამებელი მიმოხილვა	3
რეკომენდაციები	4
აუდიტის მიზანი და მასშტაბი	5
აუდიტის ანგარიშის დანიშნულება	5
ხელმძღვანელობის პასუხისმგებლობა	5
აუდიტორის პასუხისმგებლობა	6
აუდიტის ანგარიშის ფორმა	6
საქმიანობის მოკლე მიმოხილვა	6
შრომის ანაზღაურება	7
საგადასახადო კანონმდებლობა	8
სახელმწიფო შესყიდვები	10
აუდიტის ანგარიშის გასაჩივრების წესი	12

შემოკლებანი:

ა(ა)იპ - ბათუმის გამწვანებისა და ლანდშაფტური დაგეგმარების სამსახური“ - სამსახური;

შემაჯამებელი მიმოხილვა

ქვემოთ მოკლედ წარმოდგენილია აუდიტის ძირითადი შედეგები:

შრომის ანაზღაურება

აუდიტით დადგენილია, რომ ორ შემთხვევაში, შვებულებაში მყოფ მუშაკებზე, 2014 წლის აგვისტოს თვეში პრემიის სახით დარიცხული და გაცემულია 0,8 ათასი ლარი. ამასთან აღსანიშნავია, რომ საპრემიო კომისიის სხდომის ოქმებში არ არის მოცემული ინფორმაცია მუშაკების წახალისების კონკრეტული საფუძვლების შესახებ. - გვ.7

საგადასახადო კანონდებლობა

- საქართველოს საგადასახადო კოდექსის 97-ე მუხლის პირველი და 105-ე მუხლის პირველი პუნქტების მოთხოვნების გაუთვალისწინებლობით შემცირებულია 2014 წლის დასაბეგრი მოგება. - გვ. 8

- სამსახურს, 2014 წელს ქონების გადასახადით, არ აქვს დაბეგრილი ეკონომიურ საქმიანობაში გამოყენებული ბალანსზე რიცხული ძირითადი საშუალებები. - გვ. 9

სახელმწიფო შესყიდვები

- სამსახურის მიერ ვერ იქნა წარმოდგენილი 2014 წელს განხორციელებული შესყიდვების მიზნებისათვის ბაზრის კვლევის ამსახველი რაიმე დოკუმენტური სახის მტკიცებულება, რითაც განისაზღვრებოდა სამსახურისათვის მისაღები ხელშეკრულების ოპტიმალური პირობები. - გვ. 10

- აუდიტის პერიოდში, 4 შემთხვევაში ვერ იქნა წარმოდგენილი დოკუმენტაცია გაფორმებული ხელშეკრულების შესაბამისად გაკეთებული დაკვეთების შესახებ. შესაბამისად, მოცემულ შემთხვევებში ვერ დგინდება მიმწოდებლის მიერ სატენდერო

მოთხოვნით გათვალისწინებული ვალდებულებების დროულად შესრულების მდგომარეობა, რაც ხელშეკრულებების პირობების გათვალისწინებით საჯარიმო სანქციის გამოყენებას განაპირობებს. - გვ.11

- აუდიტის პერიოდში გამოვლინდა შემთხვევა, როცა მიმწოდებლის არაარგუმენტირებული წერილის საფუძველზე, გაგრძელებულია ხელშეკრულებით გათვალისწინებული ვალდებულებების შესრულების ვადები. შედეგად, მიმწოდებელზე პირგასამტეხლოს სახით არ იქნა დარიცხული 1,0 ათასი ლარი.

- გვ. 11

რეკომენდაციები

- მუშაკებზე პრემიის გაცემა უნდა წარმოებდეს დამტკიცებული ასიგნების ფარგლებში, წახალისების კონკრეტული მიზეზისა და დამსახურების გათვალისწინებით. ამასთან, დაუშვებელია შვებულებაში მყოფ პირებზე პრემიის გაცემა;

- ერთობლივი შემოსავლიდან გამოქვითვას ექვემდებარება მხოლოდ ამ შემოსავლის მიღებასთან დაკავშირებული ხარჯები. აღნიშნულის გათვალისწინებით მოხდეს 2014 წლის მოგების გადასახადის დეკლარაციის კორექტირება;

- არსებული ფაქტიური გარემოებების გათვალისწინებით მოხდეს 2014 წლის ქონების გადასახადის დეკლარაციის კორექტირება;

- შესყიდვების წლიური გეგმის პროექტის შემუშავება „სახელმწიფო შესყიდვების შესახებ“ საქართველოს კანონის მე-6 მუხლის მოთხოვნების შესაბამისად უნდა განხორციელდეს და შემდგომ დაწესდეს შესაბამისი კონტროლი მის შესრულებაზე. სახელმწიფო შესყიდვების შესახებ გაფორმებულ ხელშეკრულებებში, ცვლილებები, შესაბამისი ობიექტური გარემოებების გათვალისწინებით განხორციელდეს. ამასთან, უზრუნველყოფილი იქნეს სატენდერო მოთხოვნითა და ხელშეკრულებებით განსაზღვრული ვალდებულებების შესრულების დოკუმენტური დადასტურება.

აუდიტის მიზანი და მასშტაბი

შესაბამისობის აუდიტის მიზანია, აუდიტის ჯგუფმა წარმოადგინოს ანგარიში სამსახურის მიერ მის საქმიანობასთან დაკავშირებით განხორციელებული ოპერაციები რამდენად შესაბამისობაშია შესაფერის კრიტერიუმებთან. აუდიტის ჯგუფმა სამსახურის საქმიანობის შეფასების კრიტერიუმები განსაზღვრა მოცემული სფეროს მარეგულირებელი საკანონმდებლო, კანონქვემდებარე ნორმატიული აქტების, ხელშეკრულებების და მოცემულ დარგში მოქმედი სტანდარტების საფუძველზე, ასევე სხვა რელევანტური ინფორმაციის გათვალისწინებით.

აუდიტის მასშტაბი

აუდიტის მასშტაბს წარმოადგენს სამსახურის 2014 წლის შემდეგი ძირითადი საქმიანობები:

- შრომის ანაზღაურება
- აქტივების გამოყენება
- საგადასახადო კანონმდებლობა
- სახელმწიფო შესყიდვები

აუდიტის ანგარიშის დანიშნულება

შესაბამისობის აუდიტის ანგარიშის დანიშნულებაა, აუდიტის ანგარიშის მომხმარებლებს მიაწოდოს ინფორმაცია ყველა იმ საკითხზე, რომელიც რისკების, შეუსაბამოების ან/და ნაკლოვანებების სახით გამოვლენილი იქნა განსაზღვრული აუდიტის მასშტაბიდან.

ხელმძღვანელობის პასუხისმგებლობა

სამსახურის ხელმძღვანელობა პასუხისმგებელია 2014 წელს განხორციელებული საქმიანობის შესაბამისობაზე არსებულ კრიტერიუმებთან. სამსახურის ხელმძღვანელობა ასევე პასუხისმგებელია სახელმწიფო აუდიტის სამსახურისთვის, აუდიტის მიზნებიდან გამომდინარე, მიწოდებული ინფორმაციის სისრულესა და სისწორეზე.

ხელმძღვანელობის პასუხისმგებლობა ასევე მოიცავს შიდა კონტროლის სისტემის შემუშავებას, დანერგვასა და შენარჩუნებას, რაც საჭიროა საფინანსო-ეკონომიკური საქმიანობის პროცესის იმდაგვარი წარმართვისათვის, რომელიც არ შეიცავს

შეცდომით ან განზრახ არამართლზომიერი ქმედებით (თაღლითობით) გამოწვეულ არსებით კანონშეუსაბამოებს.

აუდიტორის პასუხისმგებლობა

აუდიტორი პასუხისმგებელია აუდიტის ანგარიშში ასახული ფაქტობრივი გარემოებების სისწორესა და მიზანშეწონილობაზე. აუდიტი წარიმართა უმაღლესი აუდიტორული ორგანოების საერთაშორისო სტანდარტის შესაბამისად (ISSAI 4100), რომელიც მოიცავს შესაბამისობის აუდიტის ჩატარებას განცალკევებით ფინანსური ანგარიშგების აუდიტისაგან.

აღნიშნული სტანდარტით მოითხოვება, აუდიტორის სამუშაო შეესაბამებოდეს ეთიკის ნორმებს და ითვალისწინებს აუდიტის იმგვარად დაგეგმვასა და ჩატარებას, რომ მოპოვებული იქნეს საკმარისი და შესაფერისი აუდიტორული მტკიცებულებები იმის შესახებ, რომ სამსახურის 2014 წლის საქმიანობა არ შეიცავს კრიტერიუმებთან არსებითი შეუსაბამობის ფაქტებს.

აუდიტის ანგარიშის ფორმა

შესაბამისობის აუდიტის ანგარიში შედგენილია უმაღლესი აუდიტორული ორგანოების საერთაშორისო სტანდარტის (ISSAI 4100) მოთხოვნების მიხედვით - „ანგარიში ვრცელი ფორმით“. „ანგარიში ვრცელი ფორმით“ გულისხმობს აუდიტის შედეგებისა და გამოვლენილი გარემოებების უფრო დეტალურ განხილვას და რეკომენდაციების გაცემას, რაც ეხმარება აუდიტის ანგარიშის მომხმარებლებს საკითხების ყოველმხრივ გაგებასა და მასზე დაყრდნობით ინფორმირებული გადაწყვეტილებების მიღებაში.

საქმიანობის მოკლე მიმოხილვა

სამსახური არის წევრთა მდგომარეობისაგან დამოუკიდებელი იურიდიული პირი და მისი მიზანი არ არის სამეწარმეო საქმიანობის განხორციელება. სამსახურის ძირითადი მიზანი და ფუნქციაა:

- ქალაქ ბათუმის გამწვანებული ტერიტორიებისა და მასზე განთავსებული ნივთების (მწვანე ნარგავების, დეკორატიული მცენარეების, ქანდაკებების (მეგლების), შადრევნების და სხვა) მოვლა პატრონობა;
- პარკების, სკვერების, ქუჩების პროექტირება, ლანდშაფტური დიზაინის მოწყობა;
- მწვანე საფარის, ბაღების, ქუჩების პროექტირება, ლანდშაფტური დიზაინის მოწყობა;

- მწვანე საფარის, ბაღების, სკვერებისა და ყვავილნარების გამწვანება - გაშენება და დაზიანებული ტერიტორიის აღდგენა; დამხმარე სანერგე-სასათბურე მეურნეობის შექმნა-განვითარება; სარგებლობაში არსებული ქონების მოვლა-პატრონობა და სხვა.

წესდებით განსაზღვრული მოვალეობების შესრულების მიზნით, სამსახური ფინანსირდება ქ. ბათუმის ადგილობრივი ბიუჯეტიდან, პროგრამის - „ქალაქის გამწვანების ღონისძიებების“ ფარგლებში გამოყოფილი თანხების სახით. აღნიშნული ასიგნების 2014 წლის საბიუჯეტო გეგმა 2131,4 ათასი ლარით განისაზღვრა. მათ შორის 1755,8 ათასი ლარი გამოყოფილი იქნა სუბსიდიის, ხოლო 376,6 ათასი ლარი - არაფინანსური აქტივების ზრდის მუხლით.

სამსახურის 2014 წლის ბიუჯეტის შესრულება შემდეგი სახისაა:

(ათასი ლარი)

დასახელება	გეგმა	საკასო ხარჯი	ფაქტური ხარჯი	გადახრა	შესრულების %
ხარჯები	1755.8	1753.9	1795.1	1.9	99.9
სუბსიდიები	1755.8	1753.9	1795.1	1.9	99.9
არაფინანსური აქტივების ზრდა	376.6	376.6	-	0	100
სხვა შემოსავლები	-	4.0	4.0	-	-
ჯამი	2132.4	2134.5	1799.1	-	-

შრომის ანაზღაურება

2014 წელს სამსახურის მიერ შრომის ანაზღაურების სახით დარიცხული და გაცემულია 1099,7 ათასი ლარი. მათ შორის 842,0 ათასი ლარი გაცემულია თანამდებობრივი სარგოს, ხოლო 257,7 ათასი ლარი პრემიის სახით. სამსახურში პრემიის გაცემა წარმოებდა პერიოდულად, საპრემიო კომისიის შესაბამისი დასკვნის საფუძველზე. 2014 წელს შრომის ანაზღაურების სახით გაცემული თანხა, სამსახურის მთლიანი ასიგნების 51,6 პროცენტს შეადგენს.

კრიტერიუმი

საქართველოში მოქმედი შრომითი კანონმდებლობის შესაბამისად¹, შვებულება წარმოადგენს შრომითი ურთიერთობის შეჩერებას, რა დროსაც დასაქმებული დროებით არ ასრულებს გათვალისწინებულ სამუშაოს. საქართველოს ფინანსთა მინისტრის 2010 წლის 25 აგვისტოს N672 ბრძანებით დამტკიცებული „საქართველოს

¹ საქართველოს შრომის კოდექსის 36-ე მუხლის 1-ლი პუნქტი და მე-2 პუნქტის „ლ“ ქვეპუნქტი

საბიუჯეტო კლასიფიკაციის“ თანახმად კი, პრემია წარმოადგენს ფულად წახალისებას. აქედან გამომდინარე, შვებულებაში მყოფ პირზე პრემიის გაცემა არ შეიძლება ჩაითვალოს ჯეროვნად შესრულებული სამუშაოსათვის გაცემულ წახალისებად.

გამოვლენილი გარემოებები

აუდიტით დადგენილია, რომ ორ შემთხვევაში, შვებულებაში მყოფ მუშაკებზე, 2014 წლის აგვისტოს თვეში პრემიის სახით დარიცხული და გაცემულია 0,8 ათასი ლარი. მათ შორის: თამარ მეტრეველს – 0,4 ათასი ლარი (შვებულების პერიოდი: 01.08.2014–04.09.2014) და დავით არზიანს – 0,4 ათასი ლარი (შვებულების პერიოდი: 04.08.2014–05.09.2014). ამასთან აღსანიშნავია, რომ საპრემიო კომისიის სხდომის ოქმებში არ არის მოცემული ინფორმაცია მუშაკების წახალისების კონკრეტული მიზეზების შესახებ.

რეკომენდაცია

მუშაკებზე პრემიის გაცემა უნდა წარმოედგინოს დამტკიცებული ასიგნების ფარგლებში, წახალისების კონკრეტული მიზეზისა და დამსახურების გათვალისწინებით. ამასთან, დაუშვებელია შვებულებაში მყოფ პირებზე პრემიის გაცემა.

საგადასახადო კანონმდებლობა

სამსახურს, 2014 წელს საგადასახადო ორგანოში წარდგენილი აქვს მოგებისა და ქონების გადასახადის დეკლარაციები, რომელთა შესაბამისადაც 2014 წელს მიღებულია 3,4 ათასი ლარის ზარალი, ხოლო ქონების გადასახადი კი არ არის დარიცხული.

მოგების გადასახადი

კრიტერიუმი

საქართველოს საგადასახადო კოდექსის 97-ე მუხლის პირველი და 105-ე მუხლის პირველი პუნქტების შესაბამისად, რეზიდენტი საწარმოს მოგების გადასახადით დაბეგვრის ობიექტია დასაბეგრი მოგება, რომელიც განისაზღვრება, როგორც სხვაობა გადასახადის გადამხდელის ერთობლივ შემოსავალსა და გამოქვითვების თანხებს შორის. ამასთან, ერთობლივი შემოსავლიდან გამოიქვითება ყველა ხარჯი, რომელიც დაკავშირებულია ამ შემოსავლის მიღებასთან.

გამოვლენილი გარემოება

სამსახურის 2014 წლის მოგების გადასახადის დეკლარაციის მიხედვით, ერთობლივი შემოსავლის სახით მიღებულია 4,0 ათასი ლარი. ამასთან, აღნიშნული შემოსავლის მიღებისათვის გაწეულ ხარჯად ფიქსირდება 7,2 ათასი ლარი, სადაც გათვალისწინებულია როგორც ეკონომიკური საქმიანობისათვის, ასევე საბიუჯეტო ასიგნების ფარგლებში გაწეული ხარჯები. შედეგად, საქართველოს საგადასახადო კოდექსის 97-ე მუხლის პირველი და 105-ე მუხლის პირველი პუნქტების მოთხოვნების გაუთვალისწინებლობით, შემცირებულია 2014 წლის დასაბეგრი მოგება

რეკომენდაცია

ერთობლივი შემოსავლიდან გამოქვითვას ექვემდებარება მხოლოდ ამ შემოსავლის მიღებასთან დაკავშირებული ხარჯები. აღნიშნულის გათვალისწინებით მოხდეს 2014 წლის მოგების გადასახადის დეკლარაციის კორექტირება.

ქონების გადასახადი

კიტერიუმი

საქართველოს საგადასახადო კოდექსის შესაბამისად², ორგანიზაციისათვის ქონების გადასახადით დასაბეგრ ობიექტს წარმოადგენს ეკონომიკურ საქმიანობაში გამოყენებული, ბალანსზე რიცხული ძირითადი საშუალებები, დაუმონტაჟებული მოწყობილობები, დაუმთავრებელი მშენებლობები და სახელმწიფო საკუთრებაში არსებული მიწა, რომლითაც სარგებლობს ან რომელსაც ფლობს იგი.

გამოვლენილი გარემოება

2014 წლის საბალანსო მონაცემების შესაბამისად, სამსახურს ეკონომიკური საქმიანობის, კერძოდ, გაწეული მომსახურების შედეგად მიღებული აქვს 4,0 ათასი ლარის ფაქტიური შემოსავალი. მიუხედავად აღნიშნულისა, სამსახურს საგადასახადო ორგანოში 2014 წელს გადაგზავნილი აქვს ნულოვანი ქონების გადასახადის დეკლარაცია. შესაბამისად, შეუსრულებელია საქართველოს საგადასახადო კოდექსის 201-ე მუხლის პირველი პუნქტის „ა“, 203-ე მუხლის „ბ“ და 206-ე მუხლის პირველი პუნქტის „ე“ ქვეპუნქტების მოთხოვნები.

² საქართველოს საგადასახადო კოდექსის 201-ე მუხლის 1 პუნქტის „ა“, 203-ე მუხლის „ბ“, და 206-ე მუხლის 1 პუნქტი „ე“ ქვეპუნქტების მოთხოვნები.

რეკომენდაცია

არსებული ფაქტიური გარემოებების გათვალისწინებით, მოხდეს 2014 წლის ქონების გადასახადის დეკლარაციის კორექტირება

სახელმწიფო შესყიდვები

სამსახურის მიერ 2014 წელს სულ გაფორმებულია 98 ხელშეკრულება, რომელთა შესაბამისად შესყიდულია 986,0 ათასი ლარის ღირებულების საქონელი და მომსახურება. გაფორმებული ხელშეკრულებიდან 18 შემთხვევაში ხელშეკრულებები გაფორმდა ელექტრონული ტენდერის, 1 შემთხვევაში - კონსოლიდირებული ტენდერისა და 79 შემთხვევაში გამატივებული შესყიდვის ფორმით.

კრიტერიუმი

სახელმწიფო შესყიდვების კანონის მიზანს წარმოადგენს სახელმწიფო შესყიდვებისთვის განკუთვნილი ფულადი სახსრების რაციონალური ხარჯვის უზრუნველყოფა³. სამსახურებრივი მოვალეობის შესრულებისას საჯარო მოსამსახურემ უნდა დაიცვას ეკონომიურობის და ეფექტიანობის პრინციპი⁴.

ტენდერის შემთხვევაში ხელშეკრულება იდება სატენდერო დოკუმენტაციაში მოცემული ხელშეკრულების პროექტის საფუძველზე, შემსყიდველი ორგანიზაციის მოთხოვნებისა და ტენდერში გამარჯვებული პრეტენდენტის წინადადების პირობების შესაბამისად⁵. შემსყიდველი უფლებამოსილია სამუშაოს ან/და მომსახურების გრაფიკით გათვალისწინებული ვადის გადაცილების შემთხვევაში დააკისროს მიმწოდებელს პირგასამტეხლო ყოველ გადაგადაცილებულ დღეზე.

გამოვლენილი გარემოება

- სამსახურის მიერ ვერ იქნა წარმოდგენილი შესყიდვის განხორციელების მიზნებისათვის ბაზრის კვლევის ამსახველი რაიმე დოკუმენტური სახის მტკიცებულება, რითაც განისაზღვრებოდა სამსახურისათვის მისაღები ხელშეკრულების ოპტიმალური პირობები⁶.

³ საქართველოს კანონი „სახელმწიფო შესყიდვების შესახებ“, მუხლი 2

⁴ საქართველოს კანონი საჯარო სამსახურის შესახებ, მუხლი 73², მე-4 ნაწილი

⁵ სახელმწიფო შესყიდვების სააგენტოს თავმჯდომარის 2011 წლის 7 აპრილის N9 ბრძანებით დამტკიცებული „გამარტივებული შესყიდვის, გამარტივებული ელექტრონული ტენდერისა და ელექტრონული ტენდერის ჩატარების წესის“ მე-19 მუხლის 1 პუნქტი.

⁶ შეუსრულებელია „სახელმწიფო შესყიდვების შესახებ“ საქართველოს კანონის მე-9 მუხლის მე-6 პუნქტის „ე“ ქვეპუნქტის მოთხოვნები.

• სატენდერო განცხადებისა და გაფორმებული ხელშეკრულებების შესაბამისად, ქვემოთ მოცემულ შემთხვევებში საქონლისა თუ მომსახურების მიწოდება უნდა განხორციელებულიყო დამკვეთის მოთხოვნის შესაბამისად მითითებულ ვადაში.

N	ხელშეკრულების ნომერი და თარიღი	მიმწოდებელი	ღირებულება ათასი ლარი	ხელშეკრულების საგანი	მიწოდების პირობა
1	N27. 17.02.2014	შპს „მწვანე სახლი“	220,0	სეზონური ყვავილები	მიწოდება უნდა განხორციელდეს მოთხოვნიდან 3 დღის განმავლობაში
2	N42. 13.05.2014	შპს „LI GROUP“	21,0	ელ. ნაწილები	მიწოდება უნდა განხორციელდეს მოთხოვნიდან 5 დღის განმავლობაში
3	N68. 02.09.2014	შპს „მწვანე სახლი“	180,0	სეზონური ყვავილები	მიწოდება უნდა განხორციელდეს მოთხოვნიდან 3 დღის განმავლობაში
4	N78. 08.10.2014	შპს „მწვანე სახლი“	35,0	სეზონური ყვავილები	მიწოდება უნდა განხორციელდეს მოთხოვნიდან 3 დღის განმავლობაში

ცხრილში მოყვანილ და სხვა ხელშეკრულებებთან მიმართებით, აუდიტის პერიოდში ვერ იქნა წარმოდგენილი დოკუმენტაცია გაკეთებული დაკვეთების შესახებ. შესაბამისად, მოცემულ შემთხვევებში ვერ დგინდება მიმწოდებლის მიერ სატენდერო მოთხოვნით გათვალისწინებული ვალდებულებების დროულად შესრულების მდგომარეობა, რაც ხელშეკრულებების პირობების გათვალისწინებით საჯარიმო სანქციის გამოყენებას განაპირობებს.

• აუდიტის პერიოდში გამოვლინდა შემთხვევა, როცა მიმწოდებლის არაარგუმენტირებული წერილის საფუძველზე, გაგრძელებულია ხელშეკრულებით გათვალისწინებული ვალდებულებების შესრულების ვადები. კერძოდ შპს „POYRAZ SHIPPING & GREWING LTD.CO.BATUMI“ -თან 2014 წლის 29 აგვისტოს გაფორმებული ხელშეკრულების შესაბამისად, მიმწოდებელს 80,5 ათასი ლარის ღირებულების ხე-ბუჩქოვანი მცენარეების მიწოდება უნდა განხორციელებინა 2014 წლის 14 სექტემბრამდე. მიმწოდებლის 2014 წლის 12 სექტემბრის წერილის საფუძველზე, ხელშეკრულებაში განხორციელებული ცვლილების შესაბამისად, მიწოდება 19 სექტემბრამდე გადავადდა. ცვლილების მიზეზი საქართველოს საბაჟო საზღვარზე დიდი რიგები სახელდება, რაც არ შეიძლება ჩაითვალოს სათანადო არგუმენტად ხელშეკრულებაში ცვლილების განსახორციელებად. შედეგად, მიმწოდებელზე პირგასამტეხლოს სახით არ იქნა დარიცხული 1,0 ათასი ლარი.

რეკომენდაცია


შესყიდვების წლიური გეგმის პროექტის შემუშავება „სახელმწიფო შესყიდვების შესახებ“ საქართველოს კანონის მე-6 მუხლის მოთხოვნების შესაბამისად უნდა განხორციელდეს და შემდგომ დაწესდეს შესაბამისი კონტროლი მის შესრულებაზე. სახელმწიფო შესყიდვების შესახებ გაფორმებულ ხელშეკრულებებში, ცვლილებები შესაბამისი ობიექტური გარემოებების გათვალისწინებით განხორციელდეს. ამასთან, უზრუნველყოფილი იქნეს სატენდერო მოთხოვნითა და ხელშეკრულებებით განსაზღვრული ვალდებულებების შესრულების დოკუმენტური დადასტურება.

აუდიტის ანგარიშის გასაჩივრების წესი

საქართველოს მოქმედი კანონმდებლობის თანახმად, აუდიტის ანგარიში ჩაბარებიდან 20 დღის ვადაში შეიძლება გასაჩივრდეს მხოლოდ საქართველოს სახელმწიფო აუდიტის სამსახურში.


აუდიტის ჯგუფის წევრები:

გოჩა შარაბიძე /უფროსი აუდიტორი/



28.12.2015წ.

გურანდა გვაზავა /აუდიტორი/



28.12.2015წ.

რამაზ დიასამიძე/აუდიტორ-ასისტენტი/



28.12.2015წ.